

# HUMS anjur program Jelajah Khatan Perdana

UB 24.12.2022 P.04

**KOTA KINABALU:** Sempena cuti sesi persekolahan hujung tahun 2022, Hospital Universiti Malaysia Sabah (HUMS) telah mengadakan program Jelajah Khatan Perdana UMS yang bermula pada 11 hingga 19 Disember 2022 lalu.

Program ini melibatkan beberapa daerah di Sabah, antaranya Pusat Rawatan Warga UMS Kota Kinabalu (11 Disember 2022), Rumah Anak Yatim Tambunan (13 Disember 2022), Masjid Riyadhus Solihin, Keningau (15 Disember 2022), Pusat Rawatan Warga UMS Kota Kinabalu (17 Disember 2022) dan Masjid Jami' Kariah Kerukan, Kuala Penyu (19 Disember 2022).

Siri Jelajah Khatan Perdana UMS ini melibatkan sekitar 255 orang peserta



**BERJAYA:** Sebahagian peserta Khatan Perdana bersama ibu bapa masing-masing semasa majlis perasmian.

yang terdiri daripada anak-anak kakitangan UMS dan kategori kumpulan keluarga

yang kurang berkemampuan berumur dari 5 hingga 16 tahun.

Naib Canselor UMS, Profesor Datuk Dr. Kasim Hj. Mansor berkata, program

seperti ini dapat meluaskan lagi visibiliti HUMS ke seluruh pelosok negeri Sabah.

“Secara tidak langsung, ia dapat memperkenalkan perkhidmatan kesihatan yang terdapat di HUMS kepada masyarakat dari luar UMS.

“Saya juga dimaklumkan program Khatan Perdana ini dianjurkan secara percuma dan sudah pasti dapat mengurangkan beban kewangan kepada keluarga yang terlibat,” katanya pada majlis perasmian Jelajah Khatan Perdana yang diadakan di Pusat Rawatan Warga UMS baru-baru ini.

Teks ucapan beliau dibacakan oleh Ketua Pustakawan UMS, Md Sazali Md Salleh.

Kasim juga berharap agar program seperti ini akan dapat terus diadakan pada masa hadapan dengan menjelajah ke daerah-daerah lain yang terdapat di negeri Sabah.

“Saya cadangkan agar program kesihatan lain dapat diperluaskan lagi seperti pemeriksaan kesihatan percuma di daerah-daerah mahupun kampung-kampung yang terdapat di negeri Sabah bagi memudahkan masyarakat mendapatkan pemeriksaan kesihatan dan sekali gus dapat memupuk semangat perpaduan dalam kalangan kakitangan kesihatan dan masyarakat.

“Diharapkan hubungan antara kalangan warga UMS dengan masyarakat sekitarnya dapat diertatkan lagi dan secara tidak langsung dapat mengurangkan beban keluarga yang terlibat dalam urusan program khatan ini.

Turut hadir Pengarah HUMS, Prof. Dr. Helen Benedict Lasimbang serta pengurusan HUMS.